

է Հաքստհաուզէն, «հայ գիւղացու վրայ, որ ըստ ամենայնի ազնիւ է, առաքինի ու հաւատարիմ: Դեռ եւս ճամբորդ Թուրնբօրը, (Tournefort) որ անձամբ չիման մէջ էր մտել Հայաստանի երկրագործների հետ, դովում է այդ հայերին՝ որպէս «աշխարհի ամենալաւ, ամենաազնիւ մարդիկը»: Ի դէպ լրսեցի ես, որ տաճկական տիրապետութեան տակ դանուող հայ գիւղացի ժողովուրդը Բայազետում, Էրզրումում, Վանում — աւելի եւս լրջմիտ է, ազնիւ, առաքինի ու վարք ու բարքով աւելի խիստ, քան՝ Երեւանի կողմերի ժողովուրդը»:

Նոյն հաստուածի ծանօթութեան մէջ (Ա. 295) Հաքստհաուզէն շեշտում է հայ ազգի այդ երկու՝ վաճառական եւ գիւղացի դասակարգերի նկարագրի մէջ եղած «տարբերակ ներհակութիւնները», անգամ՝ Կ. Պոլսում, Ձմիւռնիայում եւ «գերման բուժավայրերում» հանդիպած ու իր հայրենիքում ապրող, օրինակ՝ Երեւանի հայ վաճառականի նկարագրի միջեւ եղած տարբերութիւնը: «Ի՞նչպէս բոլորովին այլ է պատկերը՝ հայրենի երկրում, Հայաստանի՛ մէջ: Հէնց օրինակ Երեւանի վաճառականները քիչ է պատահում որ դուրս գան իրենց քաղաքից. շատ-շատ՝ նրանք ծանօթ են չրջակաների առեւտրաշահ վայրերին, իսկ Թիֆլիսից, Թաւրիզից, Էրզրումից հեռու արդէն՝ երբեք չեն գնում: Բուն գիւղացիները, ընդհակառակը, իրենց տունն ու տեղը թողնում են միայն այն ժամանակ, երբ օրինակ ուխտի են գնում»:

Այսպիսի նկարագրի տէր, ինչպէս եւ «մըտաւորապէս շատ ընդունակ» (Ա. 304) հայ ժողովուրդի պատմական-քաղաքական անախելութիւնն է համարում Հաքստհաուզէն, ինչպէս տեսանք արդէն յօդուածիս առաջին գլխում, Ասիայի ու Եւրոպայի միջեւ միջնորդ լինել:

«Կարելի է — ասում է Հաքստհաուզէն — հայերին ընտրուել որպէս քթխմոր՝ դրուած Ասիայի ետուն տարրերի մէջ, վերագարթեցնելու համար նրա հոգեկան կեանքի գրեթէ մեռած սաղմերը»:

Հայ ժողովուրդի ընկերային խաւերի մասին

եւս առատ ծանօթութիւններն ենք ստանում Հաքստհաուզէնի աշխատութիւնից:

Մենք տեսանք արդէն, թէ նա ի՞նչ ասաց հայ գիւղացու եւ վաճառականի մասին: Ինչ վերաբերում է ազնուական դասակարգին, այդ մասին նա հետեւեալն է ասում.

«Այժմ կան մի քանի (հայ) իշխանական եւ մելիքական ընտանիքներ... Նրանք, ինչպէս լսեցի, Ռուսաստանի կողմից ճանաչուել են որպէս ազնուականներ» (Ա. 96):

Համեմատելով իրար հետ վրացիների եւ հայերի ընկերային կազմը եւ բաժանումները, Հաքստհաուզէն կատարեալ հակասութեան մէջ է դնում նրանց իրար հետ (Ա. 189, 217).

«Ամէն տեղ վրացական երկիրներում իշխում են աւատական բաժանումներ եւ կազմ: Թագաւոր, իշխան, ազնուական, գիւղացի, ամէնքը միեւնոյն շղթայի մէջ՝ իրարուց կախուած են: Իսկ հայերի մէջ իշխում է վարից-վեր նահապետական կազմ ու յարաբերութիւն, նրանք ունին ընտրովի գիւղապետներ: Ամէն ինչ, որ ունի կարեւոր նշանակութիւն, վճռահատութեան է ենթարկուած համայնքի ժողովներում, որոնցից մինչեւ իսկ իշխաններն են ակնածում: Չկան իսկական ազնուականներ, ինչպէս եւ՝ գիւղացիների աւատական պարտականութիւններ»:

Եւ այսպէս, «հայ ժողովուրդի մէջ նկատելի չէ իրաւական դասերի (Staende) խտրութիւն կամ ներհակութիւն: Ընդհանրապէս կարելի է ասել, որ հակառակ վրացիներին՝ ըստ ամենայնի աւատական կազմակերպութեան, հայ ժողովուրդի ներքին կազմակերպութիւնը հիմնուած է օրգանակ-առավակալար սկզբունքների վրայ: Գոյութիւն չունի քաղաքի ու գիւղի, քաղաքացու եւ գիւղացու ներհակութիւն» (Տե՛ս նաեւ՝ Ա. 164):

Քաղաքներում ապրողների բաղդատական մեծամասնութիւնը զբաղւում է առեւտրով եւ արհեստներով, գիւղերում՝ հողագործութեամբ: Միայն շատ չնչին թուով պատուաւոր ընտանիքներ կան, այսպէս կոչուած քարթիսաններ, (ազատներ), որոնք միայն պատուոյ իրաւունքներ ունին, մէկ էլ՝ տուրքերից ազատ են: Այդպիսի մի երկու ընտանիքներ, որոնց շարքում եւ Արովեաներինը, ե-